

天一閣藏明代方志選刊

鄧州志

一九六三年八月上海古籍
書店據寧波天一閣藏明嘉
靖刻本景印原書版框高二
〇·五公分寬一五·〇公分

2D6165



鄧州志序

賜進士第中憲大夫河南按察司副使宜興楊璠撰
鄧州守潘子庭楠纂其州志成乃出質予而
以序來謁徃予數以公事按鄧觀其川原沃
衍人物惇茂蓋隱然稱巨區焉顧舊志闕畧
且三屬邑未附文獻奚從徵哉潘守乃始蒐
羅訂正并三邑彙爲通志十六卷疆理出入
山川險易炳若指掌必資圖牒故首郡縣圖

興替洪運經制鉅典莫有重焉故次郡紀皇
王御宇后妃侔德蒸靈孕瑞玉牒永光故作
帝紀易置分合時變靡常故表沿革啓土建
邦民社咸寄故表封建又人謚土官師是程
故表秩官叢才登俊寔維國珍故表選舉廣
衰險易勝蹟土風一方之紀故志興地公署
城隍樹防蒞政故志創設邦計軍需任土攸
先故志賦後河渠堤池民利寔宏故志陂堰

壁宮疊序育俊聯師故志學校報德萃靈莫
重乎祭故志祀典足食足兵維國之經故志
兵防峴碑汝棠番思遺矩故傳宦蹟英靈攸
鍾寔生淑哲論世式閭景行在茲故傳人物
終焉于是郡邑之故悉章章明備矣夫志者
史之流也要在傳綜古今審覈事實盡物理
人情之變以達于政非苟而已也是故山川
疆理辨析宜審沿革更制攷究宜詳事神使

民祠賦宜重官師人物懲勸宜公皆志之鉅
典也予觀潘守所爲志數者殆庶幾焉茲不
爲善志邪嗚呼覽鄧志者第侈豐衍之盛炫
宏麗之觀經世者奚取焉若廼風會興衰物
力登耗征徭舒急生齒增絀習尚醇靡學校
隆污政理脩紊防衛設弛思以盈縮培植俾
長爲樂土名區者得無三致意哉得無三致
意哉如是則志也其不爲虛文矣

鄧州志序

賜進士出身奉政大夫山西按察司僉事致仕大梁李濂撰
今夫鄧之爲郡也南控荆襄北連河洛西通
巴蜀東際淮海寔當天地之中號稱陸海蓋
豫州之雄鎮也鄧舊無志然志者一郡之史
也偏州小邑尚不可以無志矧鄧號稱陸海
而可以無志乎哉往上官行部至必索志觀
守對曰無之上官輒愕嘆以爲闕典嘉靖甲

寅浮梁壁峯張君剖符至乃始創爲志願所
載者止一州耳而所屬三邑則未之及觀者
猶以爲非一郡之全志也壬戌秋九月古端
石洞潘君來守是邦亟欲併收三邑以爲全
志乃慎簡郡學生之有文學者采撫三邑事
蹟以成之又敦禮鄉進士藍君儒總校閱之
勞而提綱正指發凡立例刪潤文藻叙論意
義則潘君自爲之也越暮告成於是遣使走

大梁徵序於余余以衰頽之年學殖荒落固
辭焉而貢士藍君儀又齎書來以序請乃復
之曰志之作也凡以爲民也非徒備圖籍騁
博洽以夸耀人之耳目爲也是故志輿地以
知廣輪之數志城池以嚴內外之防志建置
以稽沿革之繇志貢賦以思徵歛之艱志戶
口以察息耗之源志民性以制寬猛之宜志
俗尚以節豐儉之中志兵衛以畫守禦之方

志陂堰以儲水澤之利它若志學校以育人材志土產以裕民用志名宦俾食于茲土者善厥官志鄉賢俾遊于庠序者知所式以至道路之所通市集之所止古蹟之猶存祀典之當舉罔不蒐羅而包括之一展卷間而一州三邑之事蹟咸在目前不必廣諏郊野徧訪巖谷洗剔殘碣延咨故老而可以坐得其槩矣其爲行政之助豈淺淺哉故曰志之作

也凡以爲民也非徒備圖籍騁博洽以夸耀人之耳目爲也昔弘治初無錫邵文莊公爲許州守嘗作許志士林嘉之正德間余守沔陽亦欲作沔志時值水荒民不堪命乃汲汲拯救弗暇及文事至嘉靖間而門人童太史士疇始成之人咸稱其有良史才茲鄧志之刻也考覈精當政體攸存附論和平民功可舉且文辭典贍不贅不畧說者謂可與許沔

二志並行于世其然哉潘君名庭楠別號石
洞廣東之高要人年少舉經元治郡有惠政
及民其大者如開煤洞以興百世之利恤里
甲以裁三千之費而疏土山之窪水以達于
河俾不爲田害尤爲鄧人歌誦云

嘉靖四十三年太歲在甲子秋八月吉旦

鄧州志自序

奉訓大夫鄧州知州高要潘庭楠 撰

鄧有志自嘉靖丁巳前守浮梁張公始會當
道促就葺故於三屬邑未暇及予既踵至遂
采掇以成斯編云夫志不主載事乎內新浙
三邑屬之鄧而鄧志不載其事非所以一體
統而彰

國典也矧三邑之志之舊類皆成化末所輯因

循逮茲殆將百年故蹟益爲之茫然今復不
圖後又何述焉於是乎厘纂修之後以各郡
中學士大夫之心竊聞之近代稱良志者曰
沔陽曰惠州沔陽成于童太史惠州成于楊
吏部嘗繹二志綱例謹嚴論議揮霍率無異
司馬子長予寔傾慕之繩步範趨而不自知
其瞠乎後也蓋知愚之不相及也久矣是故
志之有圖也邦國之故分合互呈于以標大

意括繁辭爲郡縣五圖凡大事必紀爲郡紀
爲帝紀重大事也表也者明也表其至蹟之
名而明之也沿革封爵秩官選舉名至蹟矣
爲四表使之易明也輿地既定創設斯興民
乃可治若賦役若陂堰所以厚培植若學校
若祀典所以崇禮教若兵防所以肅捍衛爲
七志志治民也宦蹟列傳可以程業人物列
傳可以辨德咸傳之使咸傳弗朽也統之十

有六篇鄧之載事存焉雖存弗備也憾文獻
也後之君子補遺增闕庶或有諒于予哉是
役也鄉進士藍君偉蜚聲博雅爰綜厥成郡
學曹生楫姚生揆祁生仕聰郭生繼魯黃生
凝道均有論校之勞甫晷月而梓人報竣事
嘉靖甲子秋八月既望

鄧州志

鄧州知州高要潘庭楠修

目錄

卷之一

郡縣圖

卷之二

郡紀

卷之三

帝紀

卷之四